

थेसलोनिकेय् च्वंगु मण्डलीयात पावलं च्वःगु निगूगु पौ म्हसीका

थेसलोनिकेय् च्वंगु मण्डलीयापिन्सं ख्रीष्ट हानं झाइतिनिगु खँ बांलाक थुइका काये मफुनि। उकिं पावलं थ्व निगूगु पौलय् ख्रीष्ट हानं झाये धुंकल धकाः स्यनेकने याना जूपि फताहा गुस्तयगु खँ मखुगु खः धकाः ध्वाथुइकातःगु दु। ख्रीष्ट हानं वये न्ह्यः संसारय् मभिपि व मभिगु ज्याखँ अप्वयावइ, अले “नाश जुइमाःम्ह पापयाम्ह मनू” खनेदयकः वइ। वं ख्रीष्टयागु विरोध याना जुइ।

पावलं थेसलोनिकेय् च्वंपिं विश्वासीतयत् न्ह्यागु दुःखकष्ट वःसां विश्वासय् बल्लाना च्वनेगु व पावल अले व नाप ज्या याइपिन्सं थें थथःम्हं ज्या यानाः नयेगु अतीं नं बियातःगु दु।

धलः पौ

न्ह्यखँ १:१-२

प्रार्थना व च्वछाःगु १:३-१२

ख्रीष्ट हानं झाइगु खँ २:१-१७

विश्वासीतयगु चालचलनया बारे अतीं ३:१-१५

क्वचाय्कूगु ३:१६-१८

२ थेसलोनिकी

पावलपाखें ज्वजलपा

1 झी परमेश्वर बाः व प्रभु येशू ख्रीष्टयागु थेसलोनिकेय् च्वंगु मण्डलीयात पावल, सिलास व तिमोथीपाखें ज्वजलपा।*

2 परमेश्वर बाः व प्रभु येशू ख्रीष्टया दया माया व शान्ति छिमिके दयेमा।

ख्रीष्ट झायाः न्याय यानादी

3 छिमिगु विश्वास यक्व अप्वयावनाच्चंगु दु, अले छिमिसं थःथवय् माया यायेगु नं अप्वय्का हयाच्चंगु दु। थुकिया नितीं परमेश्वरयात सुभाय् मन्ब्यूसे मगाः।

* 1:1 १:१ प्रे १७:१

4 छिमिसं उलिमछि दुःखकष्ट सिया च्वनेमालं नं क्वान्तुक विश्वास यानाः सह यानाच्चंगु खँ जिमिसं थाय् थासय् परमेश्वरयागु मण्डलीइ च्वंपिन्त छ्यं धस्वाकाः कनेफु।

5 परमेश्वरं ख्वाः स्वयाः न्याय यानादी मखु धकाः ला थुकिं हे सीदत, छायाधाःसा छिमिसं दुःखकष्ट सियाच्चंगुलि हे छिपिं वय्कःयागु राज्यय् दुहां वनेत ल्वःपिं जुल।

6 छिमित दुःखकष्ट ब्यूपिन्त वय्कलं दुःखकष्ट बियादी। परमेश्वर न्याय यानादीम्ह खः।

7 दुःखकष्ट सियाच्चंपिं छिमित व जिमित नं वय्कलं दुःखकष्ट मदयकाबी। प्रभु येशू ख्रीष्ट वय्कःया तसकं बल्लाःपिं स्वर्गदूतत नाप स्वर्ग झायादीबलय् वय्कलं थथे यानादी।

8 वय्कलं च्यानाच्चंगु मित्याः ज्वना झायाः परमेश्वरयात म्हमस्यूपिन्त व झी प्रभु येशू ख्रीष्टयागु भिंगु खँ मन्यंपिन्त सजाँय बियादी।

9 थुपिं प्रभुयागु तसकं बल्लाःगु जलं तापाक व प्रभुयागु ख्वाः तकं स्वये मखंक च्वनाच्चने माली। अले थुपिं सदांयात नाश जुयावनी।

10 उबलय् वय्कः थः मनूतयपाखें महिमा कायेत व विश्वास याइपिं सकसितं अजू चाय्केत झाइ छायाधाःसा छिमिसं जिमिगु साक्षीयात विश्वास यात।

11 अयजूगुलि हे छिपिं झी परमेश्वरं सःतादी थें जुयाच्चने फयेमा, वय्कःयागु शक्तिं छिमिसं मतिइ तक्व भिंगु खँ व विश्वासयागु ज्या पूर्वके फयेमा धकाः जिमिसं प्रार्थना यानाच्चनागु दु।

12 थथे छिमिगुपाखें झी प्रभु येशूयागु नां तःधं जुइ, अथे हे झी परमेश्वर व प्रभु येशू ख्रीष्टयागु दया मायां यानाः छिपिं नं तःधं जुइ।

2

प्रभु झाइगु खँय् मखुगु बिचाः

1 दाजुकिजापिं, झी प्रभु येशू ख्रीष्ट झाइबलय् झीपिं फुक्कसितं वय्कः नाप छथाय् मुंकीतिनि धयागु खँ थुइकि।

2 जिमिसं छिमित बिन्ति यानाच्चना — सुनानं झी प्रभु झाइगु ई वये धुंकल धाल धायेवं छिपिं आछु-आछु कने मते, अले ग्याये मते। गुम्हय्सिनं अगमवत्तां धाःथें च्वंक, गुम्हय्सिनं वचनपाखें धाःथें च्वंक, अले गुम्हय्सिनं जिमिसं पौ च्वया थें च्वंक थथे धायेफु।

3 सुनानं छिमित मिखाय् धुलं छ्वाके मफयेमा। मनूतयसं धर्म यायेगु मत्वःतुतले, अले नाश जुइमाःम्ह पापयाम्ह मनु खनेदय्कः मवतले प्रभु झाइ मखु।

4 वं थथःम्हं तःधं जुयाः मनूतयसं परमेश्वर धयाच्चंगु व पुजा यानाच्चंगु फुक्कयात क्वह्वांकी। थःम्हं थःत परमेश्वर धयाः व परमेश्वरया देगलय् च्वंवनी।

5 छिमिथाय् दुबलय् हे जिं छिमित थथे धयागु खः। छिमिसं आः तक लुमंकातःगु हे दयेमाः।

6 ई जुल कि व खनेदय्कः वइ। आः थथे खनेदय्कः वयेत वयात सुनां पनातःगु दु धकाः ला छिमिसं सि हे स्यु।

7 अयनं वं थःगु ज्या दुने दुने यानाच्चंगु दु। वयात पनातःम्ह चिलामवंतले वयागु मभिंगु ज्याखँ खने दइ मखु।

8 वयात पनातःम्ह चिला वन कि व दुष्ट खनेदय्कः वइ। अले प्रभु येशू ख्रीष्ट जलय् झःझः धाय्क झाइबलय् छगू सासलं हे वयात नाश यानाछ्वइ।

9 दुष्टयाके शैतानयागु शक्ति दइ। वं तःतामछि अजू चायापुगु ज्या व चिं यानाक्यनी।

10 नाश जुया वनीपिन्त वं थथे यानाः मिखाय् धुलं छ्वाकि, छायाधाःसा इमिसं मुक्ति बीगु सत्य खँयात मययक्क।

11 अयजूगुलि इमिसं मखुगु खँय् जक विश्वास यानाच्चनेमा धकाः परमेश्वरयागु शक्ति इमित मखुगु खँ जक पत्याः याका तइ।

12 सत्य खँय् विश्वास मयासें मखुगु खँय् जक यःयःथे सना जुइकाः इमित सजाँय बीत वयकलं थथे यानादीगु खः।

मुक्ति बीत ल्ययातःपिं

13 प्रभुया यःपिं दाजुकिजापिं, जिमिसं परमेश्वरयात सुभाय् मब्यूसे च्वने मफु, छायाधाःसा वयकलं छिमित पवित्र आत्मां जायकाः पवित्र यानाः व सत्य खँय् विश्वास याकाः मुक्ति बीत न्हापांनिसें हे ल्ययादीगु खः।

14 थुकियागु निंति हे वयकलं जिमिगुपाखें भिंगु खँ न्यंकाः छिमित झी प्रभु येशू ख्रीष्टनापं तुं तःधकेत सःतादीगु खः।

15 अयजूगुलि दाजुकिजापिं क्वातुक विश्वास याना च्वँ। जिमिसं धयागु व च्वयाहयागु खँ न्यनेगु या।

16 प्रभु येशू ख्रीष्ट हे व झीत माया यानादीम्ह व दया माया याना गुबलें सिना मवनीगु साहस व भिंगु आशा बियादीम्ह परमेश्वर बाःनं

17 फुक्क भिंगु ज्याखँय् छिमिगु नुगः बल्लाकादीमा।

3

जिमिगु निति प्रार्थना या

1 दाजुकिजापि, प्रभुयागु भिंगु खँ न्यंकभनं न्यनावनेमा, अले छिमिसं थें फुक्कसिनं न्यना: विश्वास यायेमा धका: जिमिगु निति प्रार्थना याना च्वँ।

2 फुक्क मन्तयसं विश्वास याना मकाइगुलि मभिंपि व दुष्ट मन्तयगु ल्हातं जिमित बचय् यानातयादिसँ धका: परमेश्वरयात प्रार्थना याना च्वँ।

3 प्रभु विश्वास याये बहःम्ह खः। वयकलं हे छिमित बल्लाकादी, अले दुष्टम्ह मन्पाखें बचय् यानातयादी।

4 जिमिसं धया थें छिमिसं यानाच्वंगु दु, अले याना हे च्वनी धका: जिमिसं प्रभुयाके भरोसा कयागु दु।

5 प्रभुं छिमित परमेश्वरयागु माया व ख्रीष्टयागु सह यानाच्वनेगु शक्ति थुइकादीमा।

ज्या याना: नयेमा:

6 दाजुकिजापि, थाकु चाया: जुइपि व जिमिसं धयागु खँ मन्यपि नाप जुइ मते धका: प्रभुयागु नामं जिमिसं छिमित बिन्ति यानाच्वनागु दु।

7 जिमिसं याना: थें यायेमा: धका: ला छिमिसं सि हे स्यु। छिपिनाप च्वनाबलय् जिमिसं भचा हे थाकु मचासे ज्या याना।

8 जिमिसं सुयाकें सिति कया: नयागु मदु, बरु छिमित थाकु मजुइमा धका: जिमिसं चां न्हि सिना: सिना: ज्या याना।

9 जिमिसं छिमिगु नये मथ्या: धका: थथे यानागु मखु, बरु छिमिसं नं अथे हे यायेमा धका: क्यनेत अथे यानागु खः।

10 छिपिनाप च्वनाबलय् हे जिमिसं छिमित थथे धयागु खः — “ज्या मयासें च्वनीपिन्त नके नं मते।”

11 छिपिं मध्ये गुम्हं गुम्हयसिनं थःम्हं ज्या मयासें मेपिनिगु ज्याय् जक ल्हा: तया: सना जुयाच्वन धयागु खँ न्यना: थथे च्वयाच्वनागु खः।

12 थज्या:पिन्त जिमिसं प्रभु येशू ख्रीष्टया नामं ख्याच्व: बिया: धयाच्वना — “थःगु ल्हातं ज्या याना: न।”

13 दाजुकिजापि, भिंगु बांला:गु ज्या यायेत थाकु चाये मते।

14 आम्कन च्वपिं सुनानं जिमिसं च्वयाहयागु खँ मन्यन धा:सा अज्या:पिन्त म्हसीका: इपिं नाप तापाक हे च्वनेगु या। अले इपिं थथःम्हं मछाली।

15 अयनं वयात शत्रु थें भा:पी मते, बरु थः हे दाजुकिजायात थें न्वायेगु या।

16 शान्ति बियादीम्ह प्रभु थःम्हं हे छिमित न्ह्याबलें फुक्क कथंयागु शान्ति बियादीमा। प्रभु छिपि फुक्क नाप दीमा।

17 जि पावल थःम्हं हे छिमित ज्वजलपा च्वयाच्चनागु दु। जिं च्वया हयेगु फुक्क पौलय् थथे हे सही यायेगु खः। थ्व जिगु थःगु हे च्वयेगु पहः खः।

18 झी प्रभु येशू ख्रीष्टया दया माया छिपि सकसिकें दयेमा।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7